

Kenyataan Pengarah JAKOA Pahang tidak tepat, berbaur hasutan

Oleh [Asrol Awang](#) - September 4, 2024 @ 6:32pm
bhnews@bh.com.my



Setiausaha Kerajaan Pahang, Datuk Seri Zulkifli Yaacob. - Foto fail NSTP

KUANTAN: Video kenyataan dipercayai dikeluarkan Pengarah Jabatan Kemajuan Orang Asli (JAKOA) Pahang berhubung Projek Tanaman Semula Komersial Orang Asli (TSKOA) yang tular menerusi aplikasi TikTok semalam, tidak tepat dan berbaur hasutan.

Setiausaha Kerajaan Pahang, Datuk Seri Zulkifli Yaacob, berkata sebagai penjawat awam, kenyataan yang dikeluarkan itu boleh memberi kesan buruk kepada kerajaan negeri.

Katanya, tindakan itu juga dilihat menyalahi Peraturan-Peraturan Pegawai Awam (Kelakuan dan Tatatertib) 1993 dan Akta Rahsia Rasmi 1972 (Akta 88).

"Kerajaan negeri telah menerima pemakluman daripada pihak RISDA berkenaan pemberhentian operasi pengurusan TSKOA Pahang melalui surat bertarikh 8 Februari 2024.

"Selanjutnya, Kerajaan Pahang melalui Majlis Mesyuarat Kerajaan (MMK) pada 21 Februari 2024 telah memutuskan bahawa projek TSKOA diuruskan oleh anak syarikat kerajaan negeri iaitu Pahang Orang Asli Corporation Sdn Bhd (ORACO) melalui kaedah memungut hasil tanaman (tapping right).

"Kelulusan 'tapping right' itu adalah penyelesaian bagi mengelakkan ketirisan hasil kerajaan negeri dan menjaga kebajikan masyarakat Orang Asli yang terbabit di kawasan berkenaan," katanya dalam kenyataan media, hari ini.

Zulkifli berkata, susulan itu, kerajaan negeri melantik ORACO sebagai agensi pengurus bagi melaksana 59 projek TSKOA di seluruh Pahang yang membabitkan tanah milik kerajaan negeri.

Katanya, Ketua Pengarah JAKOA Malaysia dan Pengarah JAKOA Pahang sudah dilantik sebagai Ahli Lembaga Pengarah ORACO pada 16 November 2021 dan terbabit dalam membuat keputusan yang diputuskan oleh Mesyuarat Ahli Lembaga Pengarah.

"Oleh yang demikian, pihak JAKOA secara jelas mempunyai pengetahuan berkaitan dengan pelantikan ORACO sebagai agensi pengurus bagi projek TSKOA ini.

"Selain itu, beberapa sesi libat urus, penerangan dan lawatan di 59 tapak projek TSKOA turut dihadiri pegawai-pegawai daripada JAKOA Pahang.

"Pengambilalihan projek ini dilaksanakan bagi menjamin kebajikan masyarakat Orang Asli dan merangsang pendapatan stabil serta berterusan.

"ORACO telah mengambil beberapa langkah susulan bagi mempercepatkan pelaksanaan projek ini agar masyarakat Orang Asli dapat menikmati pulangan ekonomi dengan cepat," katanya.

Beliau berkata, Kerajaan Pahang sentiasa komited untuk menjadi sebuah negeri yang sentiasa cakna dalam menjaga kebajikan dan ekonomi masyarakat Orang Asli supaya golongan berkenaan dapat dibantu bagi meningkatkan taraf hidup mereka.

"Pada tahun ini, sejumlah RM13 juta diperuntukan untuk pembinaan Rumah Rakyat Pahang (RRP), projek baik pulih rumah, pemberian komputer riba kepada pelajar Orang Asli yang melanjutkan pelajaran ke institut pengajian tinggi, insentif perkahwinan pertama Orang Asli dan sebagainya," katanya.